

**Tentamen medicum, inaugurale, de scorbuto : quod annuente summo numine : ex auctoritate reverendi admodum viri, D. Gulielmi Robertson, S.S.T.P. Academiae Edinburgenae Praefecti : nec non amplissimi senatus academici consensu, et nobilissimae facultatis medicae decreto : pro gradu doctoratus, summisque in medicina honoribus ac privilegiis rite et legitime consequendis / eruditorum examini subjicit Richardus Kiernan, Hibernus, Societ. Reg. Med. Edin. Sodal. uet et Soc. Phys. Chir. Soc. Hon. et Praes. Ann.**

### **Contributors**

Kiernan, Richard.  
University of Glasgow. Library

### **Publication/Creation**

Edinburgh, 1783.

### **Persistent URL**

<https://wellcomecollection.org/works/k9qj8zug>

### **Provider**

University of Glasgow

### **License and attribution**

This material has been provided by This material has been provided by The University of Glasgow Library. The original may be consulted at The University of Glasgow Library. where the originals may be consulted. This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

TENTAMEN MEDICUM,  
INAUGURALE,  
DE  
SCORBUTO.

QUOD,  
ANNUENTE SUMMO NUMINE,  
Ex Auctoritate Reverendi admodum Viri,  
D. GULIELMI ROBERTSON, S.S.T.P.  
ACADEMIÆ EDINBURGENÆ Praefecti;

NEC NON  
Amplissimi SENATUS ACADEMICI consensu,  
Et nobilissimae FACULTATIS MEDICÆ decreto,  
PRO GRADU DOCTORIS,  
SUMMISQUE IN MEDICINA HONORIBUS AC PRIVILEGIIS  
RITE ET LEGITIME CONSEQUENDIS;

Eruditorum examini subjicit  
RICHARDUS KIERNAN,  
HIBERNUS,

Societ. Reg. Med. Edin. Sodal.  
Ut et Soc. Phys. Chir. Soc. Hon. et Praef. Ann.

Ea, ut potero, explicabo; non vero quasi Pythius Apollo,  
certa ut sint et fixa, quae dixero; sed ut homunculus u-  
nus ex multis, probabilia conjectura sequens.

CICERO.

Ad diem 24. Junii, hora loquoque solitis.

EDINBURGI:  
Apud BALFOUR et SMELLIE,  
Academiae Typographos.

M,DCC,LXXXIII.



Mr Paffray with compl<sup>ts</sup>  
From his hble ser<sup>t</sup>  
The Author

Fratri suo dilectissimo,

O L I V E R K I E R N A N,

De Cherrybrook in comitatu Longfordensi,

A R M I G E R O;

Nec non,

Amico suo integerrimo,

L A U R E N T I O K I E R N A N,

A R M I G E R O,

Juris-consulto apud Londinenses spectatissimo;

Illi, ob paternam in se collocatam curam;

Huic, ob singularis amicitiae

Ac favoris innumera officia;

Utrique, in animi gratissimi,

Amorisque minime fucati documentum,

Hasce studiorum medicorum primitias

D. D. Dq.

A U C T O R.



Digitized by the Internet Archive  
in 2016

# TENTAMEN MEDICUM

## INAUGURALE,

### DE

## SCORBUTO.

**D**E hujus morbi antiquitate multum inter medicos disputatum est; nunc autem scorbutum antiquis satis fuisse notum, inter omnes fere convenit: Utcunque vero se res habeat, certe parum aut nihil refert, nec facile dijudicatur lis, ex eo quod historias morborum, ab iis traditas, mancas et imperfectas esse, omnes hodierni consentiant. Quae cum ita sint, signa morbi a recentioribus tradita, Lindio praefertim celeberrimo, cui multa scorbuto vero laborantium millia videre contigit, enu-

A

merare



merare conabor; ejusque vestigia prementi, morbum in tria stadia dividere liceat.

### STADIUM PRIMUM.

Incipit insolita lassitudine, pigritia, sedendi et decumbendi amore; moestitia maeroreque frangitur animus. Ægri facies pallescit, tumescit, et quae partes antea rubicundo colore nitebant, ut oculorum anguli, jam colore obscure flavescente fordesunt. Magna est debilitas, nisu levissimo spirandi difficultas adest, cor celerrime palpitat; doloribus variis vagisque pectoris praesertim et articulorum torquetur aeger; adeo debilia fiunt genua, ut corpus vix sustentare queant. Tumescunt gingivae, pruriunt, et levissima causa sanguine fluunt, deinde quasi lividae, spongiosae et fungosae evadunt, (quod morbi signum certissimum est), et halitus gravissime olet. Cutis initio plerumque sicca asperaque fit, in eaque maculas diversi coloris et magnitudinis videre est, a subrubro in lividum colorem plerumque



plerumque abeuntes; nullam non corporis partem infestant hae maculae, plurimae vero tibias cruraque deformant; in facie autem raro cernuntur.

## STADIUM SECUNDUM.

Membra, ingravescente jam morbo, lividis dolentibusque tumoribus afficiuntur, genua praesertim tumida, rigida, pene immobilia fiunt; musculis pone foemora positis admodum jam rigescentibus, crura foemora versus retrahuntur. Animi nuncio laeto facile exhilarantur, moestitia autem vel etiam vano timore facillime franguntur; aeger sortem suam sine fine plorat, quandoque, infantis instar, a lachrymis temperare nequit. Color faciei in luridum lividumque convertitur; et dolor pectoris jam multum ingravescit; minimo movendi nisu miser saepe deficit, et nonnunquam animam subito efflat. Mens autem, et ciborum appetentia, adhuc fere integra manent.

STADI-



## STADIUM TERTIUM.

Jam omnia morbi signa in pejus ruunt; vasa rumpuntur, haemorrhagiae ex diversis corporis partibus, praesertim ex ore, naribus, anoque, contingere solent; dentes vacillant, et ex acetabulis suis excidunt; veterum ulcerum, quae jamdiu coaluerant, cicatrices aperiuntur, et callus qui, multis antehac annis elapsis, ossa fracta agglutina-verat, solvitur; levissima cutis vulnuscula, in ulcera dolentia cruentaue degenerant; fungique in iis tanta cum celeritate germinant, ut nullo medicamento, aut etiam scalpello, reprimi possint. Gravis nunc anxietas magnaue moestitia adsunt; mens fere semper sana, cibique appetentia saepe ad mortem usque manet; in ipso fere mortis articulo bene se habere videntur, praesertim dum lecto recumbunt, modo absint diarrhoea et ptyalismus: Spirandi difficultas augetur,



augetur, et pulsus, ut per totum morbi cursum, debilis; non raro, parvulum post motum, aut aërem libere admissum, sine dolore placide moriuntur. Alvus per totum morbi decursum saepe pertinaciter astricta; aliquando vero diarrhoea, persaepe cruenta, torminibus miserum torquet; urinae status varius est, etiam in eodem aegro; sed plerumque rubra, et post horas aliquot pellicula oleosa obtegitur; lingua in hoc malo fere naturalis: Caput raro aut nunquam adficitur, nisi superveniat febris, quod rarissime evenit; si quando vero accidat, aegrum e medio tollere fertur. Scorbutus quandoque hydrope, ictero, aut phthisi pulmonali, clauditur; nec praetermittendum est, aegris hoc morbo laborantibus salivam, praesertim hydrargyro adhibito, facile et copiose moveri.

In mortuorum sectionibus, ossium epiphyfes, costarumque cartilagines, solutae inveniuntur; in tela cellulosa, inter musculos, etiamque inter ipsorum fibras, sanguis magna quantitate concretus apparet; musculique



culique crura flectentes eo infarcti, usque adeo rigidi tumidique fiunt, ut membra extendi nequeant; vi autem modica facillime rumpuntur. Qui de hoc morbo ante Lindium scripsere, omnes fere de viscerum putredine verba faciunt; hos vero maculis lividis, cruore effuso natis, gangraenaeque speciem prae se infidiose ferentibus, deceptos fuisse Lindius affirmat; eosque hoc morbo necatos, nec pejus olere, nec citius in putredinem ruere, quam ullo alio morbo interfectos.

Hic morbus nunquam contagiosus evadit, nec terra marique diversus.

### DEFINITIO MORBI.

Morbus non contagiosus; asthenia, stomacace, in cute maculae diversicolores, plerumque livescentes, praesertim ad pilorum radices.

DIAG-



## D I A G N O S I S.

Nostri morbi diagnosi ab elephantiasi, syphilitide, et omnibus aliis morbis, ex definitione supra tradita, facillima evadet.

## C A U S Æ R E M O T Æ

In praedisponentes vel excitantes dividendae sunt. Primae sunt ille corporis status, qui quosdam prae aliis scorbuto opportunos reddit, qualis est

## D E B I L I T A S.

Illos enim praesertim, quibus vires morbis antecedentibus fractae fuerant, ab illustrissimo Kramer, qui, saeviente bello Germanico, in exercitu Imperatoris medicinam exercebat, hoc morbo correptos fuisse memoriae traditur; dum caeteri milites qui febribus non laboraverant, adhuc immunes manerent. Et celeberrimus Lindius nautas, ex morbis acutis emergentes, scorbuto imprimis obnoxios fuisse refert, atque illos qui  
eodem



eodem morbo antea laboraverant, quique hydrargyro utebantur, morbo citissime correptos fuisse. Ac Joannes a Bona foeminas magis quam viros huic malo opportunas esse memorat.

## T R I S T I T I A.

Plurimi indubitatae fidei auctores, hujus causae vires efficacissimas esse asserunt; melancholicos enim, languidos, timidosque, positis causis excitantibus, nunquam immunes evadere testantur; et hoc confirmatur ex eo, quod quibus animus est impavidus, hilaris, et laetus, rarissime corripitur soleant.

## CAUSÆ EXCITANTES.

Harum praecipuae esse videntur,

Cibi inopia;

Cibus parum nutrimenti praebens;

concoctu difficilis;

Frigus et humor;

Defidia;

Animi pathemata subito deprimentia.

*Cibi*



*Cibi inopia.*—Qui enim fame pereunt, semper ante mortem scorbuti signis corripuntur; dentes vacillant, spiritusque gravissime foetet. Idem quoque fertur de iis qui, religionis ergo, longam tolerant inediam.

*Cibus parum nutrimenti praebens.*—Clariss. Milman in Act. Med. Lond. duarum pauperularum casus memorat, quas, propter res domi angustas, pane, theaeque infusione victitantes, dirus invaserat scorbutus; et inter Italiae septentrionalis incolas, qui, anona ingravescente, coctis herbarum radicibus vivere cogebantur, saevam fertur edidisse stragem.

*Cibus concoctu difficilis.*—Ex diaeta nautica, quae ex farina non fermentata, piscibus carnibusque duris et salitis, plerumque conflatur, morbus hicce saepissime oritur; talem autem dietam concoctu esse difficilem, parumque nutrimenti, fractis corporis



et praefertim ventriculi viribus, praebere, omnibus luculenter patet.

*Frigus humorque.*—Locis demissis et palustribus, hunc morbum olim fuisse endemicum, ibique saevam edidisse cladem, ex variis auctoribus colligitur. Narrat ill. Van Swieten, Batavos talia loca incolentes, tempore praefertim brumali, graviter hoc morbo tentari, dum alii eorundem, eodem tempore simili victus regimine utentes, loca autem sicca habitantes, immunes evadunt; locaque hoc morbo olim vexata, nunc, paludibus exsiccatas, hoc malo vacare, constat. Mari quoque, procellosa nimboaque tempestate, saepius quam sereno sub coelo, grassatur; aëreque humido semper ingravescit. Inter nautas, quos vestimentis cultisque madidis, uti dura cogit necessitas, saevire solet; dum praefecti etiam inferioris ordinis, qui diaeta eadem aluntur, sed qui vestimenta madida mutandi copiam habent, quibusque lectis siccis dormire datur, ab hoc malo plerumque immunes evadunt.

*Desidia.*



*Desidia.*—Nautae affiduo labore occupati hoc morbo raro vexantur; mari autem tranquillo, propter ignaviam, cito corripī solent: Milites vero classici, quibus per otium ignaviae indulgere licet, primi semper scorbuto plectuntur. Terra quoque, in exercitu pedites magis quam equites hoc morbo tentantur; eo quod hos magis quam illos occupari necesse est: Quo magis etiam labori homines antea assueti fuerant, eo magis scorbuto semper periclitari videntur; hoc illustrissimus Linnaeus, epistola sua eleganti ad clarissimum Lindium, confirmare videtur: Dicit, “ Si fabri aut metalli fossores, qui gravissimo labori assuecunt, aliquando laedantur, ut lectum chirurgi perant et quiescant, dum consolidatur vulnus, interim scorbuto saepius ita inficiuntur, ut vix evadant.” Et celeberrimus refert Van Swieten, se multos vidisse, qui laboriosa vita tantum acquisierant pecuniae, ut aetate provec̃ti, leni in otio vivere possent, quique, solito neglecto labore, brevi in scorbutum inciderant.



*Animi pathemata subito deprimentia.*—

Horum effectus exemplum insigne, quod, Breda obfessa, sibi vidisse contigit, refert Vander Mye; fama nempe rerum male gestarum pervulgata, morbum graviores frequentioresque statim factum esse; post laeti vero nuncii adventum, malum quasi penitus coercitum fuisse, memorat: Necnon ab egregio illo viro, qui Ansonii navigationem circa orbem terrarum depinxit, adversis quibusdam, quae feliciter in patriam renavigandi spem minuebant, contingentibus, malum tanta cum violentia saevivisse, ut, qui ultimo morbi stadio tenerentur, perierint; qui vero adhuc suo munere fungi valebant, statim lectis fuisse affixos, memoriae traditur.

## DE CAUSA PROXIMA.

Varii varie super hac re censuere, vel potius somniavere medici. Alii ad statum sanguinis acidum, alkalinum, rancidum; alii  
ad



ad statum sanguinis sulphureo-salinum, vel  
salino-sulphureum, causam mali referentes ;  
sed jam hae periere hypotheses. Aliis vero  
summi nominis viris, putredini (quae nunc  
inter medicos plurimum obtinet opinio)  
hunc morbum tribuere placuit. Talem au-  
tem hypothesin fundamentis parum stabili-  
bus inniti, nullamque in hoc malo sangui-  
nis existere putredinem, probare conabor.  
Clariss. Pringle, ejusque aemuli, scorbutum  
ex carne putrida, aliisque causis putridis,  
semper ortum habere contendunt. Expe-  
rientiae vero gravium auctorum haec sen-  
tentia repugnat: Duo jam tradidi exempla,  
quibus hicce morbus pauperculas, diaeta  
maxima antiseptica viventes, saevissime in-  
vasit; et celeberrimus Hope, in praelectio-  
nibus suis botanicis, de quodam medico  
verba facit, qui, dum experimenti causa, pa-  
ne vel saccharo victitaret, diro corripie-  
batur scorbuto: Saccharum autem, ex peri-  
culis clarissimi Pringle, putredini vehemen-  
ter occurrere luculenter probatur. Apud  
Lindium etiam plurima hujus mali saeviter  
grassantis



graffantis exempla, cibus licet animalis vegetabilisque recens quotidie et copiose porrectus fuerit, videre est.

Quanquam sanguis non putridus aliquando non concre scat \*, nihil tamen certius est, quam sanguinem putridum nunquam coire posse † : At in hoc morbo, ex clarissimi Lindii experimentis, sanguinem semper concre scere invenitur ; centum scorbuticis, in omnibus morbi stadiis, venam pertundi curabat ; sanguinemque, etiam in postremo stadio, firmiter coiisse, ovique

\* Illustrissimus noster Cullen in tetano rem ita se habere refert ; et pariter exemplum tradit hominis epileptici, cui sanguis, paroxysmo praesente, missus non concre scebat ; sanguis vero, absente paroxysmo, detractus bene coivit.

† Putredo omnia vincula partium animalium rumpit, humores alioquin coagulabiles, cruorem, lympham, ovi albumen, amnii liquamen, in acre, et nullo porro veneno coagulabile, tabum resolvit, &c. Vide Alberti Halleri de partium corporis humani praecipuarum fabrica et functionibus opus.—*Tom. iii. p. 137.*



que recens positi albumen odore sapore-  
que retulisse, refert. Clarissimus Rouppe,  
similibus periculis institutis, sanguinem mis-  
sum adeo densum invenit, ut morbum ni-  
miae potius sanguinis densitati tribuendum  
esse censuerit. Pluribus quoque hoc mor-  
bo necatis, quos Poupartio et supradictis  
auctoribus disseccare contigit, cor et muscu-  
li sanguine concreto distenta inveniebantur : Rouppeus praesertim affirmat, mus-  
culos adeo fuisse rigidos, ut lignum duritie  
aequarent.

Si sanguis putridus et acer esset, sicuti a  
nonnullis asseritur, febrem excitare oportet ; sed in hoc malo febris raro aut nun-  
quam occurrit. Praeterea, sine aëris fixi  
evolutione, putredo accidere nequit ; aër  
autem in venas injectus convulsiones, et  
mortem subitam, producit. Celeberrimus  
Pringle equidem, ipse putredinis vindex a-  
cerrimus, hanc objectionem ingenue fatetur.

Denique, si sanguinis putredo scorbuti  
causa proxima esset, animi pathematis ex-  
citantibus, brevi tempore, ac quasi subito,

vix



vix tolli posset. Attamen nuncio laeto et spe victoriae, hoc malum cito et penitus fuisse sublatum, nullis adhibitis remediis, celeber. Ives et Vander Mye memorie tradunt. Fidem etiam superare videtur, pathemata deprimentia, fluidorum putredinem, derepente, vel gignere vel intendere posse; non desunt autem exempla, quibus scorbutum violenter et subito excitarunt; et modo affectos, brevi e medio sustulerunt. *Anson's Voyage.*

His omnibus igitur consideratis, fluidorum putredinem diri hujus mali causam proximam non esse, concludere fas est.

Hac itaque sententia improbata, causam proximam nullatenus in fluidis existere, a libique investigandam esse, censemus; ad hoc exequendum nulla ratio potior, quam morbi causas earumque effectus perpendere, videtur.

Omnia hujus morbi indicia summam solidorum debilitatem et flacciditatem denunciant; et causae quas iterum perstringere  
gere



gere liceat, ad tales gignendos effectus imprimis idoneae videntur.

*Cibi inopia.*—Corpus humanum vitae actionibus quotidie deteritur, ipsiusque vires, nisi ingestis idoneis reficiatur, deficient necesse est.

*Cibus concoctu difficilis.*—Hic diuturno usu ventriculi vires convellit, parumque nutrimenti ad corpus restaurandum praebet; unde effectus, antedictis similes, oriuntur oportet.

*Frigus humorque.*—Horum actione conjuncta, graviores semper in corpus humanum eduntur effectus, quam si seorsim egissent; quod oriri videtur, ex eo quod (teste illustrissimo Culleno) evaporatione generetur frigus; de hujus vero totum corpus, ventriculumque praesertim, debilitandi viribus adeo inter omnes convenit, ut nullo commentario opus sit.



*Desidia.*—Ad vitam fanitatemque tuendam, stimuli externi, inter quos corporis exercitatio maxime eminet, imprimis necessarii sunt: Exercitatione modica sanguinis circuitus promovetur; robur musculorumque tensio adaugentur; hac vero omiffa, omnes functiones languescunt: Ut verbis denique eruditissimi Gaubii utar, nimia quies et potentias motrices, et quae movendae sunt partes, in torporem conjicit.

*Animi pathemata deprimentia.*—Animum inter et corpus nexus atra tegitur caligine, mortalibusque penitus celari videtur: Se autem invicem, aliquandoque violenter, afficere, plurimis probatur exemplis; pathematibus, praesertim deprimentibus, ventriculi totiusque corporis vires pessundari, ex omnium medicorum consensu liquido patet.

Haec verba facit illustrissimus Lindius, cujus de scorbuto sententia omnibus aliis anteponenda est: “ I am fully confirmed in my opinion, that whatsoever weakens  
the



the constitution, and especially the organs of digestion, may serve, without any other cause, to introduce this disease, in a slighter or higher degree, even among such as live on fresh greens, vegetables, or the most wholesome diet, and in the purest air."

His igitur omnibus rite perpenſis, nonne nobis, tanta auctoritate ſuffultis, concludere fas ſit

### CAUSAM PROXIMAM,

Totius corporis, ventriculique praefertim, debilitate conſiſtere, qua ad nutrimentum corpori parandum impar evadit \* ?

Poſita

\* Forſan ex putredinis fautoribus dicet aliquis, *ſolidorum putredini* cauſam hujus mali tribuendam eſſe : Quid vero per putredinem intelligendum, nondum inter medicos convenit ; mea quidem ſententia, ſphacelus et gangraena ſola ſolidorum putredinem indicant : Haec autem, etiam in peſſimo hujus morbi ſtatu, rariffime occurrunt.



Posita *nostra* causa proxima, plurium signorum ratio adeo evidens est, ut pauca eorum solummodo enucleare necesse videatur. Signa, primo in stadio notatu digniora, sunt,

1. *Spirandi difficultas, et palpitatio cordis.*—Haec duo ex eadem causa pendent; palpitatio, ex eo quod cor debile, sanguinem musculorum actione acceleratum, ac in ipsum ideo majori quantitate advectum, in pulmonem magis nunc quam in sanitate resistantem, propellere nequeat: Haec autem resistantia tam ex respirationis musculorum, thoracem dilatare non valentium, quam ex ipsius pulmonis atonia, et sanguine in ipso retardato, oritur: Pulmonibus hoc modo infarctis, major aëris quantitas ad ipsos dilatandos desideratur, unde celerior et difficilior respiratio.

2. *Dolores varii vagique, pectoris praesertim, &c.*—Ea est cordis et arteriarum debilitas, ut sanguis cursum suum libere  
non



non peragat, sed quasi retardetur; unde vaporum distentio, et ex hac dolor; hoc confirmatur ex eo, quod ruptis vasis, sanguineque effuso, dolores cessent; eodem modo dolores pectoris et articulorum explicari possunt.

3. *Gingivarum tumores, pruritus, haemorrhagiae, halitusque foetor.*—Gingivae flaccidae et laxae sanguinis congestum facile admittunt, unde tumidae apparent; pruritus ex sanguine accumulato, vasa distendente, quae, vel minima vi illata, facile rumpuntur, sanguinemque fundunt, pendere videtur.

Halitus foetorem, effluviis e gingivis putridis dimanantibus omnes fere scriptores tribuunt, sed immerito, ut mihi videtur: Halitus enim, nulla putredine apparente, vel etiam suspicata, gravissime olet, ut ex his qui per aliquod tempus inedia passii sunt, ex foeminis menstruum debitum solventibus, et ex his quoque, qui hydrargyro utuntur, constat: Nonne ergo potius a morbida glandularum



glandularum salivariarum, vel pulmonum secretionem, halitus foetor pendere videatur? Haec sententia celeberrimi Lindii observationibus suffulciri videtur; cadavera enim, hoc malo mortuorum, neque gravius olere, neque citius quam alia cadavera putrescere, refert.

Signa in secundo stadio notanda sunt,

1. *Membrorum lividi dolentesque tumores, genuum praesertim.*—Corpore erecto, vel cruribus dependentibus, vasa debilia et flaccida, propter difficiliorem sanguinis, contra gravitatis vim, ascensum, adeo distenduntur, ut humoribus dilatantibus resistere nequeant; unde dolor et tumor artuum illorum.

2. *Musculorum rigiditas, crurumque retractionis.* Musculorum rigiditas ex sanguinis effusi distentione mechanica, testantibus Rouppeo et Poupartio, pendet; muscoli autem artus flectentes, hoc modo sanguine distensi,



distensi, breviores fiunt, membraque ideo quibus inferuntur retrahuntur.

3. *Moestitia*, &c.—Animi alacritas et fortitudo ex certo quodam corporis vigore pendet; unde, corpore debilitato, moestitia et timiditas sequuntur.

Signa in stadio tertio notanda sunt,

1. *Haemorrhagiae ex diversis corporis partibus*.—Tanta est in hoc stadio vaforum flacciditas, ex virium vitalium defectu, ut sanguis, solito more non circulatus, ruptura aut anastomosi facile prorumpat.

2. *Cicatrices ulcerum callique ossium solvuntur*.—Haec signa, in praelectionibus suis, absorptioni clarissimus Joannes Hunter tribuit; et rem sic se habere verisimile videtur; corpus enim quotidie deteritur, et, in hoc morbo, nutrimento ad jacturam reparandam non suppeditato, hae partes,



tes, ob statum ipfarum minus perfectum, primo patiuntur.

3. *Ulceræ mali moris, fungique in iis, &c.*—  
Ea est vaforum atonia, ut pus laudabile, ex quo ulcerum curatio pendet, formari nequeat; hinc ulceræ mali moris: Fungi ex sanguine effuso formari videntur.

#### P R O G N O S I S.

Priusquam aliquid de ejus præfagiatur exitu, quamdiu duraverit, quamque alte radices egerit morbus, considerandum est. Si stadium primum non excefferit, imo, etiam si stadium secundum ingressus fuerit, visceribus adhuc illibatis, loci mutatione, victusque ratione idonea, curatio absque aliorum fere remediorum auxilio, speranda est. Cæterum, si ad ultimum stadium pervenerit, et graviora adfuerint signa, qualia sunt, magna spirandi difficultas, deliquium animi, diarrhoea



arrhoea cruenta, haemorrhagiae immodicae, aut hydrops; infelix exitus jure timendus est. Absentibus vero his signis funestis, in quovis stadio sanatu minime difficilis invenietur.

Causis signisque hujus morbi perpensis, causaque proxima, ex horum consideratione, extra dubium, ut spero, posita; jam ad curationem devenimus, quae felici cum exitu, sequenti ratione fieri experientia constat: nempe,

I. Vires vigoremque corpori restituendo.

II. Urgentia signa mitigando.

Primo consilio satisfit,

1. Causis excitantibus occurrendo.
2. Remedia roborantia et stimulantia adhibendo.

Causis excitantibus occurritur,

1. Diaeta nutriente.
2. Coelum frigidum humidumque mutando.
3. Exercitatione.
4. Animum exhilarando.



*Diaeta nutriens.*—Haec ex vegetabilibus recentibus carneque recens maſtata optime paratur, et ad hunc morbum curandum omnibus aliis praeſtat : Ex his autem varia parantur alimenta, inter quae optima ſunt jura carniū quibus olera incoquantur, ut braſſica, lactuca, chicoreum, ſpinachia, acetofa, cherophyllum, petroſelinum, imprimis porrum, cepae, rapa, daucus ſativus, &c. Mari vero, ubi haec comparari non poſſunt, jura carniū concreta, vulgo jus portabile, vegetabiliaque condita, praeſertim braſſica, eorum vires obire comper- tum eſt. Quando aegri diaeta nautica per aliquod tempus uſi ſunt, vegetabilia recentia et fructus horaeos vehementer exoptant ; et haec multum prodeſſe conſtat, praeſertim ſtimulantia et acida, qualia ſunt naſturtium aquaticum, cochlearia, caeteraque antiſcorbutica dicta. Omnibus fructibus palmam praeripiunt aurantia, limones, et citrea ; haec enim non ſolum ad corpus nutriendum, verum etiam ad ſecretiones excretionefque promovendas, quibus morbus ſemper



semper sublevatur, plurimum prodesse inveniuntur.

Potus optimus est pura et bene lupulata cerevisia, aut quae ex pinu Americana et cum faece Sacchari conficitur (Anglice *spruce-beer*) vel succus ex pomis expressis. Clariss. M'Bride infusum bynes in hoc morbo multum laudat: Et celeberr. Lind hunc liquorem nutrientem, et hoc morbo laborantibus valde idoneum, experientia confirmat. A Boerhaavio, Lindio, et Rouppeo, lac, et ejus serum, praesertim iis qui multum debilitati sunt, apprime esse utilia affirmatur. In principio autem haec diaeta caute adhibenda est, ne diarrhoea, duris et ficcis victitare consuetis, superveniat. Memoria autem tenendum est, diaetam ab illa, quae ad morbum producendum contulit, natura diversam, semper adhibendam esse, praesertim si aegri, quorum desiderio semper indulgendum est, desiderent: Constat enim ex observationibus clariss. Wilson, morbum diaeta vegetabili terra inductum, diaeta



diaeta nautica mari curatum fuisse.—*Wilson on the Influence of Climate.*

2. *Coelum frigidum humidumque mutando.*

—Ex humido impuroque aëre in purum ficcumque migratio, scorbuto laborantibus admodum prodest. Hoc confirmatur a clar. Lindio, qui multa refert exempla, in quibus plurimi ex aëre humido culcitisque madidis in navibus, in aëra ficcum et cubilia ficca terra, advecti, nullo alio auxilio adhibito, fanitatem recuperavere: Haec vero migratio caute instituenda est; non enim, nisi petentim et prius vini cyatho hausto, ex aëre navis in aërem atmosphaericum exportandi sunt; alioquin, Lindio teste, ni subito mortem oppetant timendum est. Quando vero mari haec aëris mutatio fieri nequeat, frigoris atque humoris effectibus, ignibus vestimentisque calidis occurrendum est. Scorbutum vestimentorum inopia saepius quam ulla alia causa in navibus exoriri, celeberr. Rouppeus meminit: Industriaque qua ad haec egregius Cook advertibat, jure causa



causa censenda est, quare nautas suas, diaeta licet nautica plerumque viventes, per triennium a diro malo immunes servavit.

*Exercitatio.*—Haec incipienti morbo feliciter occurrere invenietur, morbo vero provecto, cautissime adhibenda est; non defunt enim qui in hoc morbi statu, corpus exercere coacti, animam subito efflavere: Qui igitur multum debilitati sunt, frictione sedulo uti debent: Si vero lecto vulneribus vel quovis alio casu affigantur, tunc stratum artificio aliquo suspendi, motumque oscillatorium talem, qualem aeger perferre possit, perfici, Rouppeus suadet; et talem motum multum prodesse Lindius affirmat.

*Animum exhilarando.*—Multa tradidimus exempla, in quibus moestitia, animique pathemata deprimentia, morbum violenter et subito excitarunt; nec defunt in quibus pathemata exhilarantia morbum pepulere. Celeber. Ives se septuaginta hoc morbo laborantes,



laborantes, 30. Januarii die 1774, in mari Mediterraneo vidisse memorat; 11. autem Februarii sequentis die, hostium classi appropinquandi gaudio, letaque victoriae spe elati, adeo revaluerunt, ut omnes munere suo fungi valerent. Vander Mye pariter nobis narrat, Breda obseffa, morbum, nuncio laeto, ex toto fere coercitum fuisse, aegrosque nullis remediis adhibitis convalescuisse. Ægrotantium animi igitur, quantum fieri potest, exhilarandi sunt; huic autem consilio, musica, saltatio, et alia id genus oblectamenta, respondent.

Ad secundam partem primi consilii nunc devenimus, nempe,

Remedia stimulantia et roborantia; hæc sunt,

I. Vinum.

II. Tonica remedia.

*Vinum.*—Hoc omnibus aliis stimulantibus præstat: Corpus enim non solum stimulat et roborat, verum etiam mentem exhilarat, curam expellit, metumque abigit.

Hinc,



Hinc, quantum in hunc morbum valeat, luculenter apparet: Praeclarum hoc remedium saccharo et succo limonum dilui Lindius praecipit; unde magis diureticum et diaphoreticum (quod in hoc morbo maximi momenti est) evadit: Et omnibus aliis medicamentis hanc mixturam cardiacam palam praeripere contendit.

Ubi vero non datur copia vini, potus, quodammodo huic similis, Anglice *Punch* dictus, ex spiritu destillato aqua diluto, cum saccharo largaque vi succi limonum aut aurantiorum confectus, felici cum exitu adhibeatur.

*Remedia tonica.*—Inter haec cortex Peruvianus omnibus aliis jure antefertur; et in hoc malo, praesertim ulceribus mali moris urgentibus, multum prodesse invenitur; nihil vero, nisi larga manu datus, efficit. Amara quoque vino infusa, sicuti gentianae radix, chamemaeli flores, aurantiorum cortex, et centaurii minoris summitates, ad ventriculi totiusque corporis vires reficiendas,



das, ab illustrissimo Lindio multum collaudantur. Aquas ferratas Hoffman et Van Swieten laudant: Hae vero, ferrum in aqua aëre fixo saturata solvendo, ubique terrarum facillime parandae sunt.

Exercitatio, quando aegri vires patiuntur, ad corpus roborandum maxime confert; caveatur autem ne aut inviti, aut ad fatigationem usque, sese exerceant. Denique tamen observandum est, nutrimento idoneo negato, causisque excitantibus non evitatis, medicinam frustra parari.

Jam secundo consilio (urgentia scilicet signa mitigare) consulendum est. Haec vero sunt gingivae tumidae, fungosae, sanguine fluentes; dolores; crura tumida vel ulcerata; diarrhoea cruenta; dyspnoea; denique haemorrhagiae periculosae.

Ad gingivarum mala sublevanda, gargarismate ex aqua hordeat. spirit. vitrioli, et tinctura myrrhae composito, ora, praecipue ante cibum porrectum, lavanda; fungique scalpello amovendi sunt.

Dolores :



Dolores : Hi generali medendi rationi plerumque cedunt ; si minus, et praesertim si cutis sit arida, sudorifica, ut balneum tepidum, et pulvis Doveri, commendantur ; his vero deficientibus, epispastica, partibus dolentibus applicata, maxime profutura invenientur.

Crura tumida vel ulcerata in situ supino tenenda, aceto calido, vel herbarum aromaticarum et stimulantium, decoctis fovenda, et postea linteis calidis involuta, fasciis leniter comprimentibus liganda sunt. Quidam artus inferiores totumque corpus, capite excepto, terra recenter effossa per horas aliquot quotidie sepeliere, donec sudor copiose erupisset, et commodum inde afferri putarunt.

Si crura fuerint dura et retracta, aceti vel spiritus vinosi vapore ad sudorem eliciendum fovenda, oleoque palmae, vel sambucino, postea inungenda sunt.

Ulcera linteo sicco, vel myrrhae, vel corticis Peruviani tinctura imbuta, curanda ; et

E

ad



ad fungos coercendos leniter comprimenda sunt.

Diarrhoea cruenta : Ad hoc plerumque lethale signum sublevandum, validum corticis Peruviani decoctum, cum opii tincturae quantum tuto adhiberi potest, libere sumendum ; jusculumque ex carne ovina confectum, cum vini rubri pauxillo, pro enemate, saepius injiciendum est. Ipecacuanha, parvis dosibus adhibenda, a Lindio commendatur.

Dyspnoea : Ad hanc sublevandam, oxymel. scillit. gum. ammoniac. aliaque expectorantia, cum epispasticis pectori applicatis, remedia efficacissima comperiuntur.

Haemorrhagiae, cortice Peruviano, astringentium et libero acidorum fossilium usu, sublevandae sunt. Si sanguis ex parte, ad quam chirurgi manus pervenire potest, fluat, astringentia et fasciae extrinsecus comprimentes admovenda sunt ; si vero ex parte abscondita majori copia effluat, vix ullo medicamento aegrum a periculo eripias. Haec sunt signa sublevationem (ut  
mihi



mihi videtur) maxime postulantia : Si huic morbo alius, uti phthisis, iëterus, aut hydrops, conjungitur, medicamentis unicuique idoneis, scorbuto amoto, debellandus est.

De prophylaxi dicere supervacaneum duxi ; causis enim remotis evitandis, quas accurate enumerare conatus sum, tota consistit.

F I N I S.



